

摛藻堂四庫全書薈要

史部

欽定四庫全書叢書要

史部

唐書卷一百八十八



詳校官編修臣王天祿

欽定四庫全書會要卷五千三百二十八

史部

唐書卷一百八十八

宋 端 明 殿 學 士 宋 祁 撰

傳第一百一十三

楊時朱孫

楊行密字化源廬州合肥人少孤與羣兒戲常為旗幟
戰陣狀年二十入盜中刺史鄭綮捕得異其貌曰而
且富貴何為作賊縱之與里人田頤陶雅劉威善僖宗

在蜀刺史遣通章行在日走三百里如約而還秦宗權
寇廬壽間刺史募殺賊差首級為賞行密以功補隊長
都將忌之俾出戍將行都將問所乏對曰我須公頭即
斬之自為八營都知兵馬使刺史走淮南節度使高駢
因表為廬州刺史乃以田頤為八營都將陶雅為左衛
山將討定鄉盜騎將呂用之恐行密不可制遣俞公楚
以兵五千屯合肥名討黃巢而陰圖之行密擊殺公楚
秦宗權遣弟度淮取舒城行密破走之時張教據壽州

許勣據滁州與行密爭戰又舒人陳儒攻刺史高渢渢
來告難行密未能定賊吳迴李本逐渢據其城行密虜
之取舒州為勣所奪光啟二年張教遣將魏虔攻廬州
大將李神福田顥破之楮城畢師鐸秦彥攻高駢呂用
之以駢命署行密行軍司馬督其兵進援客袁龔說行
密曰高公耄昏妖人用權彥乃以逆除暴熾其亂公亟
應必得其地行密乃檄湖州裒兵而東次天長而揚州
陷行密薄城而屯用之以兵屬之彥以騎兵背城戰行

密卧帳中令曰賊近報我俄而陷一屯別將李宗禮入
曰兵相迫戰且不利請堅壁徐引歸可也李濤怒曰以
順去逆何衆寡為今尚何歸願以所部前死行密喜益
甲出戰俘殺如藉彥軍不出會騎死襲勸行密舉軍縞
素大臨三日進攻城未能下用之將張審晟詭伏西壕
殺閻者啟外兵彥軍疲守邏皆潰去行密入據揚州未
聞月孫儒奄至兵銳甚襲見行密曰公之入以少擊衆
室家未完若外被重圍情見勢殆不如避之行密執海

陵鎮遏使高霸殺之并其衆輦所收財歸于廬於是朱全忠自為淮南節度使遣將張廷範致命而授行密副使以行軍司馬李璠知留後行密大怒廷範璠不敢入全忠更請以行密知觀察留後當此時孫儒彊赫然有吞吳越意行密欲遁保海陵襲勸還廬州治兵為後計行密乃還既又謀趨洪州襲不可曰鍾傳新興兵附食多未易圖也孫端據和州趙暉屯上元結此二人以圖宣州我綽綽有餘力矣行密從之端暉次采石行密自

穆潭濟端等戰不勝襲勸行密速趨曷山堅壁以須宣人求戰示以弱待其怠一舉可禽宣將蘇塘兵二萬對屯行密不戰分竒兵伐木開道四出塘驚北遂圍宣州刺史趙錠糧盡親將多出降初行密有銳士五千衣以黑縉黑甲號黑雲都又并盱眙曲溪二屯籍其士為黃頭軍以李神福為左右黃頭都尉兵銳甚曲溪將劉金策錠心遁給曰將軍若出願自吾壘而偕錠喜多遺之金許婁以女明日譟城上曰劉郎不為爾壻錠宵遁獲

之鍾全忠故人也發使求之襲曰斬首送之無後慮乃歸鍾首于汴昭宗詔行密檢校司徒宣歙池觀察使時韓守威以功拜池州刺史行密表徙湖州以兵護送而李師悅在湖州與杭州刺史錢鏐戰不解蘇湖常潤亂甚行密雖得宣州而蔡儔為孫儒所破以盧州降儒進攻行密行密復入揚州北結時溥扞儒全忠遣龐師古將兵十萬自潁度淮助行密敗於高郵行密懼退還宣州遣安仁義襲成及取潤州自將三萬屯丹陽仁義又

取常州殺錢鏐將杜稜儒亦使劉建鋒奪潤常帝以杭州為防禦使授鏐以宣州號寧國軍授行密節度使大順二年儒屯溧水循山構壁行密遣李神福屯廣德計曰兵倍不戰當避其銳驕之乃退舍儒衆以為怯守者懈神福夜襲走之儒將康旺取和州安景思取滁州神福擊降旺逐景思攻腰山屯破之禽儒將李弘章俄而田頤劉威為儒所敗行密欲守銅官神福曰儒掃境以來利速戰宜堅壁老其師則我無敵矣又出輕騎絕賊

糧道使前不得戰退無仰儲不亡何待於是行密以神
福為宣池都游奕使儒始乏食常熟名賊陳可兒間儒
行密之鬪竊入常州自稱制置使行密遣陶雅守潤州
張訓入揚州因執楚州刺史以輕兵襲常州斬可兒孫
儒圍行密宣州凡五月不解臺濛作魯陽五堰控輕舸
饋糧故行密軍不困卒破儒即表田頤守宣城長驅入
揚州戰凡七年定八州生人將盡行密勞隱休息其下
遂安議出鹽茗畀民輸帛幕府高勗曰瘡破之餘不可

以加斂且帑貲何患不足若悉我所有易四鄰所無不
積日財有餘矣行密納之始選吏綏勸所部蔡儔以廬
州叛附朱全忠納孫儒將張顥而倪章據舒州與儔連
和行密遣李神福攻儔破其將儔堅壁不出顥超堞降
行密以隸袁積軍積請戮之行密愛其勇更置于親軍
未幾儔自殺行密先冢皆為儔發掘吏請夷發儔世墓
不許表劉威為刺史遣田頤攻歙州於是刺史裴樞有
美政民愛之為拒戰頤兵數却樞朝廷所命者食盡欲

降遺行密書請還京師行密以魯邵代樞州人不肯下
請陶雅代雅於諸將最寬厚以禮歸樞于朝是歲李神
福拔舒州倪章亡以神福為舒州刺史乾寧二年行密
襲濠州李簡重甲絕水縋而入執刺史張璲以劉金守
之進取壽州汴將劉知俊儲穀石碣將南襲張訓屯連
水遣兵浮海掩得其虜知俊戰不勝因攻連水大敗身
僅免詔拜行密淮南節度副大使知節度事檢校太傅
同中書門下平章事封弘農郡王董昌為錢鏐所攻來

告窮行密遣臺濬攻蘇州安仁義田顧攻杭州身督戰
別將張崇為鏐執行密欲嫁其妻答曰崇不負公願少
待俄而還自是行密終身倚愛明年五月破蘇州執鏐
將成及以朱黨守之朱延壽拔蘄光二州行密以霍丘
當南北走集以邑豪朱景為鎮將景驍毅絕人諸盜莫
敢犯汴將寇彥卿以騎三千襲之致全忠厚意景不許
苦戰彥卿敗而去田顧魏約張宣共圍嘉興鏐大將顧
全武救之執宣約逐顧於驛亭埭未幾泰寧節度使朱

瑾率部將侯瓚來歸太原將李承嗣史儼史建章亦來
奔行密推赤心不疑皆以為將於是兵銳甚彊天下帝
惡武昌節度使杜洪與全忠合手詔授行密江南諸道
行營都統討洪汴將朱友恭覲金率騎兵萬人與張崇
戰泗州金敗瞿章守黃州聞友恭至南走武昌柵行密
遣將馬珣以樓船精兵助章守友恭次樊港章據險不
得前友恭鑿崖開道以彊弩叢射殺章別將遂圍武昌
章率軍薄戰不勝友恭斬章拔其壁全忠率葛從周萬

騎攻光州柴再用遣小校王稔以輕騎覘賊汴兵圍之
候者請救再用曰稔必殺賊第無往稔解鞍自如暮依
櫛步戰殺傷多汴兵乃解時亡馬法峻稔追汴軍得馬
乃還從周涉淮圍壽州而龐師古覇金以衆七萬壁清
口朱延壽擊從周軍敗之行密欲汴圍解乃擊師古李
承嗣曰公能潛師趨清口破其衆則從周不擊而潰行
密出車西門繇北門去以銳士萬二千蹴雪馳迫清口
不進壅淮上流灌師古軍張訓自漣水來行密使將羸

兵千人為前鋒師古易之方圍棋軍中不顧朱瑾侯瓊
以百騎持汴旗幟直入師古壘舞槊而馳訓亦登岸超
其柵汴軍大囂即斬師古士死十八全忠聞之與從周
皆遁走追及壽陽大破之叩渾水方涉為瑾所乘溺死
萬餘瑾徙屯安豐汴將牛全節苦鬪後軍乃得度會大
雪士多凍死潁州刺史王敬堯燎薪屬道汴軍免者數
千人未幾復圍壽州七日走馬珣收散卒三百自黃州
間道趨分寧絕山谷襲撫州鏐將危全諷列四壁皆萬

人珣謂諸將曰為諸君擊中壁食其穀以歸乃夜擊之全諷走明日珣高會廣旗幟伐鼓循山而下連營潰既還行密罵曰豎子不遂據其城邪光化元年秦裴取鏐崑山鎮顧全武圍之行密諸將數敗全武遂圍蘇州臺濛固守鏐自以舟師至濛食盡行密遣李簡蔣勲迎之敗全武兵濛得還後軍潰裴援絕全武勸其降決水灌城城壞裴乃降鏐喜具千人食以待既至士不及百鏐曰軍寡何拒之久裴曰糧盡歸死非僕素也初成及之

執行密閱其室唯圖書藥劑將辟為行軍司馬固辭引
刀欲自刺行密乃止厚禮而歸之鏐亦遣魏約等還全
忠攻蔡州奉國節度使崔洪來丐師明年遣朱瑾率兵
萬人攻徐州屯呂梁洪遂來奔會雨霖瑾引還行密攻
徐州汴將李禮壁宿州以援全忠自將次輝州行密戰
不勝乃解青州將陳漢賓擁兵送款行密王綰張訓周
本率兵迎之漢賓中悔綰訓入見漢賓紿麾下饗我不
過日中若不至可攻城漢賓釋甲聽命光州叛行密自

攻之汴將朱友裕來救撤圍還全忠諭馬殷成汭雷滿
合兵攻行密汭滿猶豫汭惡殷事全忠掠其境滿來結
好行密壁黃郢間杜洪寘鳩于酒于井棄城去行密知
不入全忠又遣使者督殷汭滿連兵解圍行密還詔加
檢校太尉兼侍中天復元年傳言盜殺錢鏐李神福急
攻臨安顧全武列八壁相望神福伏軍青山偽若引去
謀奔告全武悉衆躡之神福返鬪與伏夾攻斬首五千
級執全武明日遂圍臨安鏐將秦昶以步兵三千降神

福乃令軍中護鏐先墓禁樵采鏐遣使者厚謝神福以
鏐不死臨安未可下納犒而還明年大將劉存率兵二
萬戰艤七百伐湖南殷伏軍長磧洲以樓船據上流乘
風颶沙彊弩射之存軍燼行密歸顧全武於鏐鏐亦釋
秦裴以報帝在鳳翔以左金吾大將軍李儼為江淮宣
諭使授行密東面諸道行營都統檢校太師守中書令
封吳王承制封拜且告難時已削奪全忠封爵詔西川
河東忠義幽州保大橫海義武大同八道攻之詔朱瑾

為平盧節度使繇海州取青齊馮弘鐸為感化節度使出漣水攻徐宿使朱延壽圍蔡州田頤捍錢鏐行密討杜洪馬殷以分全忠勢行密乃以李神福為鄂岳招討使劉存副之遣冷業攻馬殷杜洪戰屢敗嬰城請救於全忠全忠使韓勍率步兵萬人屯灞口荆南節度使成汭亦悉衆救洪神福逆戰敗之汭溺死勍引衆走冷業屯平江為三壁殷將許德勲以銳卒號定南刀夜襲業擊三壁皆破禽業掠上高唐年而去是時杜洪困甚且

禽會田頤安仁義絕行密召神福存還計事洪復
振頤之敗更以臺濛為宣州觀察使復遣神福存攻鄂
州順義軍使汪武與頤連和歙州刺史陶雅攻鍾傳兵
過武所迎謁縛武於軍無錫當浙衝行密使票將張可
悰守之鏐勁兵三千夜襲城可悰以百騎擊走之吏皆
賀答曰未也方勞諸軍一戰乃蔽火斂旗以須覘者以
告鏐兵復至可悰大破之臺濛卒行密以子渥為宣州
觀察使天祐二年王彥章李德誠拔潤州殺安仁義以

王茂章為潤州團練使。勦彥章等率舟師復伐殷。攻岳州。許德勲、詹佶以舟千二百艘入蛤子湖、淬山之南。為木龍鎖舟。夜徙三百舸斷楊林岸。彥章入荊江。將趨江陵。佶蹕之。德勲以梅花海鷗迅舸進。斷木龍舟。蔽江車弩。亂發。執彥章溺死。萬人殷釋。彥章還。德勲謂曰：「為我謝吳王。」僕等數人在湖湘不可冀也。行密寬易善遇。下能得士死力。每宴使人負劒侍陳。人張洪因以劒擊行密。不中。近將李友禽斬之。悅日侍劒如故。行密蚤出。有

盜斷馬鞅不之間以故人人懷恩始乘孫儒亂府庫彈
空能約已省費不三年而軍富雄嘗過楚州臺濛盛供
帳待之行密一夕去遺衣臥內皆經補浣濛還之行密
曰吾興細微不敢忘本君笑我邪濛大慙登城見王茂
章營第曰天下未定而茂章居寢鬱然渠肯為我忘身
乎茂章遽毀損方帝困鳳翔再遣使督兵以為行密可
亢全忠者然兵至宿州給言糧盡乃還全忠脅帝東遷
行密恥憤被病全忠亦知天子倚行密為重乃弑帝以

絕人望行密聞之發喪不視事三日因是病篤召將吏
付家事問嗣於其佐周隱對曰宣州司徒易而信讒唯
淫酗是好不可以嗣不如擇賢者時劉威以宿將有威
名隱意屬威行密不答因以王茂章代渥使亟還行密
召所親嚴求曰我使周隱召吾兒而不至奈何求徃見
隱召檄仍在几始渥守宣州押牙徐溫王令謀約渥曰
王且疾而君出外此殆姦人計他日有召非我二人勿
應也及是二人以符召渥渥至行密承制授檢校太尉

同中書門下平章事淮南節度使留後行密諱渥曰左
衙都將張顥王茂章李遇皆怙亂不得為兒除之卒年
五十四遺令穀葛為衣桐瓦為棺夜葬山谷人不知所
在諸將謚曰武忠張顥議歸都統印於宣諭使李儼行
節度事諸將畏顥無敢對渥流涕騎軍都尉李濤曰都
統印先帝所以賜王父子安得授人諸將唯唯顥投袂
去乃共請於儼承制授渥兼侍中淮南節度副大使東
面諸道行營都統封弘農郡王渥好騎射初與許元膺

為刎頸交及嗣位事皆決之諸將莫敢忤渥求王茂章
親兵不得及去宣輦惟帝以行茂章嫚罵不與踰年遣
兵五千襲之茂章奔杭州秦裴執鍾匡時渥授以江西
制置使朱思勍范師從陳鎰以兵戍洪州渥為張顥所
制二人者渥腹心也顥脅以為有異謀遣陳祐疾馳懷
短兵微服入秦裴帳中裴大驚命飲召三將入皆色動
酒行祐數其罪皆斬之渥召周隱曰君嘗以孤為不可
嗣何也隱不對遂殺之

贊曰行密興賤微及得志仁恕善御衆治身節儉無大過失可謂賢矣然所據淮楚士氣剽而不剛行密無霸材不能提兵為四方倡以興王室熟視朱溫劫天子而東謀窮意沮墮死牖下可為長太息矣

時溥徐州彭城人為州牙將黃巢亂京師節度使支詳遣溥與陳璠率兵五千西討次河陰軍亂剽居人溥招戢其衆引還屯境上疑不敢歸詳以牛酒犒士約悉貲其罪軍乃入共推溥為留後遂詳客館溥厚具贊裝遣

璠護還京師夜駐七里亭璠擅殺詳屠其家溥怒署璠宿州刺史俄殺之別遣將引銳兵三千入關僖宗因以武寧節度命之巢敗東走圍陳州營溵水秦宗權方據淮西相聯結溥地介於賊乃悉師討之軍鋒甚盛連戰輒克授東面兵馬都統遂合許充鄆兵逐尚讓於太康斬首數萬級讓以所部萬人降溥遣將李師悅等追尾巢至萊蕪大破之諸將爭得巢首而林言斬之持歸溥以獻天子故破賊溥功第一加檢校司徒同中書門下

平章事進檢校太尉兼中書令鉅鹿郡王宗權阻兵拜
溥徐州行營兵馬都統賊平與朱全忠爭功嫌甚日構
孫儒方與楊行密爭揚州詔全忠為淮南節度使平其
亂溥自以先起功名顯朝廷位都統顧不得而全忠得
之頗悵恨全忠使司馬李璠郭言等東兵道宿州遺溥
書請假道溥辭不可間其墮以兵襲之言戰甚力解而
還全忠怨自是連歲畧徐泗師不弛甲全忠自將及其
郊未得志引去溥窮乞師於李克用克用為攻碭山朱

友裕救之各亡其大將友裕進攻宿州不能拔時大順元年也明年丁會築堤閼汴水灌宿郢三月拔之使劉瓔守而溥將劉知俊引兵二千降全忠軍益不振民失田作又大水荐飢死喪十七以上乃請和於全忠全忠約徙地而罷兵昭宗以宰相劉崇望代之授溥太子太師溥慮去徐且見殺惶惑不受命諭軍中固留有詔聽可泗州刺史張諫聞溥已代即上書請隸全忠納質子焉溥既復留諫大懼全忠為表徙鄭州刺史諫畏兩怨

集已乃奔楊行密行密以諫為楚州刺史并其民徙之
以兵屯泗朱友裕率軍攻溥嬰城不出有語全忠曰軍
行非吉日故師無功全忠遣參謀徐璠至軍責諭友裕
答曰溥困且破乃猶妖辭士心墮矣焚其書督餌急
攻之溥將徐汝出降溥求救於朱瑾全忠自以兵屯曹
將去留精騎數千授霍存曰事急可倍道趨之瑾兵二
萬與溥合攻友裕存引兵疾戰瑾溥還壁明日復戰霍
存敗死之進逼友裕友裕堅營不出瑾食盡還兗州全

忠使龐師古代友裕溥分兵固守石佛山師古攻拔之
自是完壘不戰王重師牛存節等梯其堞以入溥徙金
玉與妻子登燕子樓自焚死寶景福二年全忠遂有其
地私置守焉

朱宣宋州下邑人父以豪猾聞里中坐鬻鹽抵死宣亡
命去青州為王敬武牙軍黃巢之亂敬武遣將曹存實
率兵西入關而宣為軍候道鄆州是時節度使薛崇拒
王仙芝戰死其將崔君裕攝州事存實揣知兵寡襲殺

之據其地遂稱留後以宣功多署濮州刺史留總帳下
兵中和初魏博韓簡東窺曹鄆引兵濟河存實迎戰死
于陣宣收殘卒嬰城簡圍之六月不能拔引兵去僖宗
嘉其守拜宣天平節度使累加同中書門下平章事宣
有衆三萬弟瑾勇冠三軍陰有爭天下心瑾嗜殘殺光
啟中求婚於兗州節度使齊克讓託親迎載兵竊發逐
克讓據府自稱留後天子即授以帥節兄弟雄張山東
時秦宗權悉兵攻朱全忠使秦賢列三十六壁自將督

戰全忠大恐求救于宣宣與瑾身率師往擊宗權宗權敗走全忠厚德宣兄事之情好篤密而內忌其雄且所據皆勁兵地欲造怨乃圖之即聲言宣納汴亡命移書詆讓宣以新有恩於全忠故答檄恚望全忠由是顯結其隙使朱珍先攻瑾取曹州壁乘氏宣救曹不克奔還范珍圍濮州宣使弟罕救濮全忠自將擊罕斬之拔濮州朱裕奔歸鄆使珍薄鄆挑戰宣不出裕為書紿降道珍入信之夜以兵數千傅城裕開門軍入縣門發死者

數千縱石擊未入者殺裨將百餘人復取曹以郭詞
為刺史大將郭銖斬詞奔全忠瑾謀悉兵襲汴全忠乃
自攻瑾瑾以兵掠單父與全忠將丁會轉戰不勝去景
福初復伐宣令從子友裕先驅自繼之次衛南宣以輕
兵夜掩友裕軍走之據其營全忠未知運糧以入乃覺
走瓠河與友裕相失距濮十五里舍明日友裕乃至宣
留濮州全忠令友裕馳壯騎諜鄆虛實身將而北會宣
引還縱兵戰全忠南走絕塹去幾不脫大將多死乃謀

持久徼極取宣歲一再暴其鄙奪之食俘其工織勵有
存者宣令賀瓌守濮州為友裕所攻委城走友裕進擊
徐州時溥求援於宣戰不勝而還溥遂亡全忠即遣龐
師古攻齊州宣瑾皆戍以兵久不下乾寧元年全忠身
往薄清河結壘宣瑾三分其兵出擊之全忠迎戰東阿
南風急汴軍居下甚懼俄而風返全忠得縱火焚其旁
標薰漲天宣等大北是夏全忠壁曹州南宣薄戰禽其
將三人全忠還明年使朱友恭擊兗州瑾堅壁乃慙而

守宣饟瑾友恭奪其糧全忠自軍單父會宣求救於李克用友恭退壁曹南數月全忠自伐宣刈其麥敗克用將李承嗣等乃還宣追之大鈔曹州其秋全忠復攻鄆壁梁山宣克用挑戰全忠設伏破之斬首數千級引而南克用躡全忠後至栢和大寒全忠軍多死不閱月復圍兗州因略地龔丘賀瓌以奇兵擊全忠輜重不及戰鉅野東瓌大敗見禽師無子餘軍遁大陂風暴起全忠曰豈殺人有遺邪乃搜軍中復斬數千人風亦止執瓌

示城下瑾之兄瓊守齊州見勢屈以州歸全忠結同姓
懼全忠許之輕騎至軍全忠勞苦加禮因使招瑾瑾領
精騎高池笑語如平生歡乃使將胡規偽送款欲得瓊
躬上符節全忠不之虞瑾伏壯士橋下瓊單騎至方交
語士突起拔瓊以入斬其首棄城下汴軍大震全忠恚
數日乃去三年克用使其將李瑭以兵屯莘援宣為羅
弘信所破全忠大喜度宣可困遣龐師古伐宣宣逆戰
敗于馬頰河師古迫其西門兵不出全忠之攻宣凡十

興師四敗績宣才將皆盡益內沮度不能與全忠確則
固守增堞深溝為不可逼明年葛從周密造舟於塹師
人踰而升宣出奔為民所縛追至執以獻全忠斬之而
納其妻使師古攻兗州二月食盡瑾自出督芻粟轉掠
豐沛間而子用貞及大將康懷英等舉城降瑾引麾下
走沂州刺史尹懷賓不納乃趨海州刺史朱用芝以其
衆與瑾奔楊行密行密迎之高郵解王帶以賜表領徐
州節度使畀以兵師古從周以兵七萬討行密瑾敗之

清口擊殺師古而從周還師至涇水方涉瑾追及殺傷溺死幾盡瑾事行密尤盡力

孫儒河南河南人以趨下橫里中隸忠武軍為裨校與劉建鋒善黃巢亂以兵屬秦宗權為都將光啟初宗權遣儒攻東都留守李罕之出奔儒焚宮闈屠居人河陽節度使諸葛爽與儒戰洛水爽敗儒亦東圍鄭州朱全忠屯中牟救之不敢前儒衆夜登城刺史李璠走儒進拔河橋遂取河陽留後諸葛仲方出奔全忠壁河陰儒

掠汴鄙全忠兵郤屯胙城東南列偽旗鼓疑之儒乃還
會全忠與宗權戰宗權敗走儒聞殺孟人汎尸於河焚
井邑乃去宗權又遣儒鈔淮南乘高騎之亂儒留濠州
會楊行密得揚州宗權使弟宗衡爭淮南以儒為副建
鋒為前鋒儒常曰丈夫不能苦戰萬里賞罰繇已奈何
居人下生不能富貴死得廟食乎未幾汴兵攻蔡宗權
召之儒稱疾不往宗衡督之即大會帳下酒酣斬宗衡
并其衆與建鋒許德勲等盟有騎七千因略定傍州不

海甸兵數萬號土團白條軍文德元年破揚州自為淮南節度使與時溥連和初全忠嘗以書招儒故又納款於汴且送宗衡秦彥畢師鐸首全忠藉以聞昭宗授儒檢校司空全忠署為招討副使龍紀初悉兵攻宣州行密取淮南儒還行密走始得潤常蘇三州兵益彊使建鋒守潤常全忠約行密圖之儒謀定江南乃北爭天下畏全忠擣虛乃遣人卑辭厚賄全忠薦於朝詔授淮南節度使大順元年行密取潤州以安仁義守之常州以

李友守之儒怒三分其軍度江建鋒復拔常潤仁義走
全忠遣將龐從等軍十萬奄至高郵儒悉師禦之故仁
義間取潤州劉威田頤等敗建鋒於武進取常州杭州
錢鏐將沈粲自蘇州奔儒行密諸將在潤常者皆為建
鋒所逐仁義頤棄潤州走明年儒引兵自京口轉戰召
建鋒皆行行密諸將屯險者聞儒至皆走頤威等合兵
三萬邀儒黃池儒遣馬殷擊走之儒營廣德乘勝至東
溪淮人大恐行密諸將屯西溪自引軍逆戰儒軍圍

之數重黑雲將李簡以騎馳之行密乃免儒遂圍宣州
行密乞師於錢鏐會谿潦暴湧廣德黃池諸壁皆沒儒
分兵取和滁二州其秋儒焚揚州引而西傳檄遠近號
五十萬旌旗相屬數百里所過燒廬舍殺老弱以給軍
行密懼將遁去戴規曰儒軍數敗今掃地而至決死於
我若吾遣降者間至揚州撫尉衣食使儒軍聞其家尚
完人人思歸不戰可禽也行密乃遣親將入揚州取儒
營糧數十萬斛以稟飢民儒屯廣德陶雅以騎軍破儒

前鋒屯嚴公臺十二月頤威與儒決戰皆大敗儒連屯
稍西行密使陶雅屯潤州扼其歸路景福元年儒復圍
宣州屯陵陽行密戰不利謀出奔時劉威方繫獄且死
行密窮更召問計對曰儒焚倉墮壘以來糧盡將為我
禽若勁兵背城坐制其困李神福亦請據險邀儒糧行
密乃分兵攻廣德壁而絕饟道軍適大疫儒病痞遣建
鋒殷鈔諸縣行密知城下兵寡乃晨出率仁義頤背城
決戰破五十壁會暴澍且冥儒軍大敗儒病甚股弁不

能興顧執儒獻行密諸將皆降儒就刑于市見劉威曰
中君之謀儒嘗引鑑搔首曰此頭不久當入京師至是
傳首闕下建鋒殷哭之相語曰公常有志廟食吾等有
土當廟以報德及殷據湖南表儒贈司徒樂安郡王立
廟以祀

唐書卷一百八十八

唐書卷一百八十八考證

楊行密傳左衝○閣本作左衡

二人者渥腹心也○

臣酉

按上文云朱思勍范師從陳

鐸以兵戍洪州下文云三將入皆色動則此二人當

作三人為是然諸本俱作二未詳

孫儒傳仁義走○

臣酉

按上文行密取潤州以安仁義

守之常州以李友守之則儒復拔常潤二州守將當
皆走今但云仁義走而不及李友疑有脫文

仁義顧棄潤州走○

臣酉

按上文仁義間取潤州劉威

田頤等取常州此處不應云仁義顧棄潤州走

唐書卷一百八十八 考證

欽定四庫全書

唐書卷一百八十九

史部

宋 端 明 殿 學 士 宋 祁 撰

列傳第一百一十四

高趙田朱

高仁厚亡其系出初事劍南西川節度使陳敬瑄為營
使黃巢陷京師天子出居成都敬瑄遣黃頭軍部將李
鋌輩咸以兵萬五千戍興平數敗巢軍賊號蜀兵為鴟

兒每戰輒戒曰母與鴉兒鬪敬瑄喜其兵可用益選卒二千使仁厚將而東先是京師有不肖子皆著疊帶冒持挺剽閭里號閑子京兆尹始視事輒殺尤者以怖其餘竇濬治京兆至殺數十百人稍稍憚戢巢入京師人多避難竇雞閑子掠之吏不能制仁厚素知狀下約入邑閭縱擊軍入閭子聚觀嗤侮於是殺數千人坊門反閉欲亡不得故皆死自是閭里乃安會邛州賊阡能衆數萬畧諸縣列壁數十涪州刺史韓秀昇等亂峽中韓

求反蜀州諸將不能定敬瑄召仁厚還使督兵四討屯
永安斬能遣謀者入軍中吏執以獻謀自言父母妻子
囚於賊約不得軍虛實且死仁厚哀之曰為我報賊明
日我且戰有能釋甲迎我者署背曰歸順皆得復農矣
縱謀去命諸將毀柵鼓而前賊渠羅渾擎設伏詐降仁
厚遣將不持兵入諭其衆皆真降渾擎詐窮而逸吏執
之仁厚曰愚人不足語降衆署背得免則告諸壁大軍
至賊帥句胡僧大驚斬之莫能禁衆執胡僧以降韓求

知大賊已禽徇諸壁曰敢出者斬衆罵之求赴水死衆
鉤出斬以徇餘柵皆下仁厚按轡裴回視賊壘吏請焚
之仁厚命取財糧乃縱火尸賊成都仁厚還天子御樓
勞軍授仁厚檢校尚書左僕射眉州刺史敬瑄與仁厚
謀曰秀昇未禽貢輸梗奪百官乏奉民不鹽食公能破
賊當以東川待公仁厚許之詔拜行軍司馬仁厚聞賊
儲械子女皆在屯乃以銳兵瀕江伐木頽水礙舟道負
岸而陣使游軍逼賊久不戰則夜以千卒持短刀彊弩

直薄營火而譟之秀昇率舟兵救火仁厚遣人斃鳩沒鑿
舟皆沈衆懼多潰秀昇斬潰兵欲脅止之衆怒執秀昇
以降仁厚問狀對曰天子蒙塵反者何獨我仁厚檻車
送行在斬於市東川節度使楊師立初隸神策軍累遷
檢校司空同中書門下平章事聞敬瑄以仁厚代已有
望言敬瑄諷帝召師立以本官兼尚書右僕射師立益
怒移檄言敬瑄十罪殺監軍田繪屯涪城遣兵攻綿州
不克又檄劍州刺史姚卓文共攻成都假卓文為指揮

應接使卓文不應帝乃下詔削官爵敬瑄即表仁厚為東川節度留後楊茂言為行軍副使楊棠為諸軍都虞候率兵二萬討之師立遣大將張士安鄭君雄守鹿頭關仁厚次漢州前軍戰德陽師立嬰城閱四旬夜出兵擾北柵仁厚設兩翼而伏披柵門列炬賊不敢進伏發擊走之楊茂言謂仁厚且敗引兵走久乃還明日會諸將仁厚曰副使當以死報天子斬而徇於是士安不敢出師立自督士十戰皆北仁厚約城中斬首惡者賞君

雄誦于軍曰天子所討反者耳吾等何與乃與士安譁而進以仁厚書示師立曰請以死謝衆自沈于池死君雄悉誅其家獻首天子仁厚入府縱繫囚賑貧絕詔拜劖南東川節度使光啟二年遂據梓州絕敬瑄君雄時為遂州刺史亦陷漢州攻成都敬瑄使部將李順之逆戰君雄死又發維茂州羌軍擊仁厚斬之乾寧中皆追贈司徒

趙犨陳州宛丘人世為忠武軍牙將犨資警健兒弄時

好為營陣行列自號令指顧羣兒無敢亂父叔文見之曰是當大吾門稍長喜書學擊劍善射會昌中從伐潞州收天井關又從征蠻忠武軍功多遷大校黃巢入長安所在盜興陳人詣節度府請擊為刺史表于朝授之既視事會官屬計曰巢若不死長安必東出關陳其衝也乃培城疏塹實倉庫峙藁薪為守計民有貲者悉內之繕甲兵募悍勇悉補子弟領兵巢敗果東奔賊將孟楷以萬人寇項擊擊禽之僖宗嘉其功累遷檢校司空

巢聞楷死驚且怒悉軍據溵水與秦宗權合兵數十萬
繚長壕五周百道攻之州人大恐礮令曰士貴建功立
名節今雖衆寡不敵男子當死地求生徒懼無益也且
死國不愈生為賊乎吾家食陳祿誓破賊以保陳異議
者斬衆聽命引銳士出戰屢破賊巢益怒將必屠之乃
起八仙營於州左僭象宮闈列百官曹署儲糧為持久
計宗權輸鎧仗軍須賊益張讐小大數百戰勝負相當
故人心固乃間道乞師於朱全忠未幾汴軍至壁西北

陳人思奮擊引兵急擊賊破之圍凡三百日而解中和
五年擢彰義軍節度使巢雖敗宗權始熾畧地數千里
屠二十餘州唯陳賴孽獨完以功檢校司徒加泰寧浙
西兩節度皆在陳并領之龍紀初進同中書門下平章
事忠武軍節度仍治陳州流亡踵還與弟昶至友愛後
將老悉以軍事付之乃卒贈太尉孽悉忠力以孤城抗
賊巢卒敗亡然附全忠亦賴其力復振故委輸調發助
全忠常先它鎮云

昶字大東神采軒異而內沈厚有法度破孟楷功多巢
之圍昶夜扼師疲而寢如有神相之者黎曙決戰士爭
奮死鬪禽賊首數人斬級千餘顙領泰寧以昶為州刺
史檢校尚書右僕射當時方鎮言忠壯吏治舉言顙昶
之老乃授留後遷忠武節度使亦留陳進檢校司徒
勗勸農桑於人有恩惠加同中書門下平章事乾寧二
年卒年五十三贈太尉

顙子珝字有節雄毅喜書善騎射巢之難激勵麾下約

皆死以先冢邇賊畏見殘騎即夜縋死士取柩以入庫
有巨弩機牙壞不能張珝以意調治激矢至五百步人
馬皆洞賊畏不敢逼以勞檢校尚書右僕射遙領處州
刺史昶帥忠武珝遷行軍司馬昶之喪知忠武留後政
簡濟上下安之全忠表為忠武軍節度使陳王惡善圮
珝疊甓表墉遂無患三加檢校太保光化三年同中書
門下平章事進兼侍中封天水郡公按鄧艾故蹟決翟
王渠溉稻以利農一家三節度相繼二十餘年陳人宜

之天復初韓建帥忠武以珝知同州節度留後昭宗還長安詔入朝賜號迎鑾功臣以檢校太傅為右金吾衛上將軍從東遷歲餘以疾免卒年五十五贈侍中陳人為罷市

田頤字德臣廬州合肥人畧通書傳沈果有大志與楊行密同里約為兄弟應州募屯邊遷主將行密據廬州頤謀為多攻趙鍾於宣州鍾出東溪乘暴流以逸阻水解甲謂追騎不能及頤乘輕舠追之鍾驚遂見禽行密

表顏為馬步軍都虞候沙陀叛將安仁義奔淮南行密
大喜屬以騎兵使在顏右兩人名冠軍中共攻常州殺
刺史杜稜錢鏐方屯潤州一夕潰會孫儒南畧顏等屯
丹陽儒火揚州壁廣德顏破其屯與戰顏走行密怒奪
其兵或諫行密曰彊敵傅壘不用顧非計也行密復將
顏儒詔書仁義通好以疑行密行密待益厚署行軍副
使卒用此二人功禽儒乃表仁義為潤州刺史顏寧國
軍節度使累遷檢校太保同中書門下平章事仁義至

檢校太保頤已平馮弘鐸至揚州謝行密左右求質不已獄吏亦有請頤怒曰吏覬吾入獄邪又求池歛為屬州行密不許頤始怨將還指府門曰吾不復入此是時錢鏐部將徐綰叛鏐入杭州逐綰綰屯靈隱山迎頤頤遣客何曉見鏐曰王宜東保會稽無為虛屠士衆也鏐曰軍中小叛當然公為人長何助逆耶頤攻北門鏐登城與語射中麾下頤築壘絕往來道鏐患之出金幣十輦募能奪地者陳璋以死士三百免胄馳擊奪其地鏐

授璋衢州刺史頤攻城未能克將濟江絕西陵為鏐將所却圍益急先是行密欲女鏐子鏐急乃遣元璫迎女且告行密曰頤得志為患必大請以子為質願召還頤行密使人謂頤曰不還我遣人代守宣州頤不從鏐輸錢二百萬緡犒軍頤又請鏐子元瓘出質乃與綰引兵還然內怨行密與鏐因移書曰侯王守方以奉天子譬百川不朝于海雖狂奔瀆漫終為涸土不若順流無窮也東南揚為大刀布金玉積如阜願公上天子常賦頤

請悉儲峙單車以從行密答曰貢賦繇汴而達遼足資
敵爾於是頽絕行密大募兵李神福自行密頽必叛宜
先圖之行密曰頽有大功而反狀未明殺之諸將不為
用頽遣其佐杜荀鶴至汴通好全忠喜屯宿州須變行
密以康儒在頽所故授廬州刺史以間之頽怒族其家
儒曰公不用吾謀死無地矣頽與安仁義連和攻昇州
劫刺史李神福妻息厚養之神福方與劉存攻鄂州行
密召之神福謂諸將曰頽反此心腹疾宜速攻之頽遣

李臯詔書神福曰公家在此苟從我當分地以王答曰吾以一卒從吳王任上將終不以妻子易意乃斬臯破頤兵於曷山始頤將王壇等以舟師躡神福後至吉陽磯不戰會日暮壇掩神福軍半濟神福反舟順流急擊大破之因縱火士多死明日壇復戰敗於皖口頤乃自將來戰神福曰賊棄城而來此天亡也乃瀕水堅壁不出請行密以兵塞頤走道仁義焚東塘戰艦夜攻常州不克轉戰至夾岡立二幟解甲而息追兵莫敢嚮頤陳

舟蕪湖行密遣將王茂章攻潤州仁義以善射冠軍中
當時稱朱瑾槊米志誠弩皆為第一仁義常曰志誠弩
十不當瑾槊之一瑾槊十不當吾弓之一人以為然又
其治軍嚴善得士心戰卒數百濠梁不毀開門鬪先告
所當中然後射之茂章等不敢與確行密遣使謂曰吾
不忘公功能自歸當復為行軍副使但不可處兵仁義
欲降其子固諫乃止行密召其將臺濠泣語曰人嘗告
顧必反我不忍負人顧果負我吾思為將者非公莫可

濛頓首謝率騎度江為陣以行士笑其怯濛曰顧宿將多謀備之何害與王壇等戰廣德濛以行密書遺壇諸將皆再拜氣奪濛麾兵擊之壇走神福既以不戰困顧頤給言母病還至蕪湖聞壇敗留精兵二萬屬郭行琮身走城濛之行為狹營小舍覘者以為才容二千人顧輕之不復召兵與戰黃池矢石始交而濛遁兵爭逐北遇伏頤大敗召蕪湖兵不得入行琮及壇皆歸行密顧憲自料死士數百號爪牙都身薄戰濛退軍示弱士超

隍濛殊死戰軍潰顏奔城橋陷為亂兵所殺年四十六
其下猶鬪示顏首乃潰顏始以元瓘歸戰不勝輒欲殺
之顏母護免及鏐與行密合顏曰今日不勝必殺元瓘
已而顏死傳首至淮南行密泣下葬以庶人禮亦葬康
儒還元瓘於杭顏善為治資寬厚通利商賈民愛之善
遇士若楊夔康軒夏侯淑殷文圭王希羽等皆為上客
文圭有美名全忠鏐交辟不應顏置田宅迎其母以甥
事之故文圭為盡力夔知顏不足亢行密著溺賦以戒

顧不用行密使王茂章穴地取潤州安仁義以家屬保城樓兵不敢登名李德誠曰汝可以委命乃抵弓矢就縛父子斬揚州市蒙字頂雲亦合肥人顧破行密表為檢校太保宣州觀察使天祐初卒

朱延壽者廬州舒城人事行密破秦彥畢師鐸趙鍾孫儒功居多行密欲以寬恕結人心而延壽敢殺時揚州多盜捕得者行密輒賜所盜遣之戒曰勿使延壽知已而陰許延壽殺之初壽州刺史高彥溫舉州入朱全忠

行密襲之諸將憚城堅不可拔延壽鼓之拔其城即表
為淮南節度副使全忠猶屯壽春延壽以新軍出每旗
五伍為列遣李厚以十旗擊西偏不勝將斬之厚請益
五旗殊死戰全忠引去於是取黃蘄光三州以功遷壽
州團練使昭宗在鳳翔詔延壽圍蔡以披全忠勢擢奉
國軍節度使全忠兵每至延壽開門不設備而不敢逼
也延壽用軍常以寡鬪衆敗還者盡斬之田頤之附全
忠延壽陰約曰公有所為我願執鞭頤喜二人謀絕行

密行密憂甚給病目行觸柱僵妻延壽姊也掖之行密泣曰吾喪明諸子幼得舅代我無憂矣遣辯士召之延壽疑不肯赴姊遣婢報故延壽疾走揚州拜未訖士禽殺之而廢其妻

贊曰全忠唐之盜也行密志梟其元而後已田頤使出軍賦而助之此其謀責難而絕之非忠於唐也棄所附而覲尊大亦已妄矣孔子稱孟公綽為趙魏老則優不可以為滕薛大夫如仁厚田朱材不足為吳蜀之老可

與事天子哉

唐書卷一百八十九

唐書卷一百八十九考證

田頤傳侯王守方以奉天子譬百川不朝于海雖狂奔
澶漫終為涸土○天子下疑有闕文

唐書卷一百八十九 考證

謹案卷一百八十八第一頁後五行陶雅為左衡

山將刊本衡訛衝據毛本改

第十五頁前二行拜溥徐州行營兵馬都統刊本

徐訛蔡據下文及舊書改


第十六頁後六行遣將曹存實按舊書作曹全政

五代史作曹全歲均與此異

卷一百八十九第四頁後八行孟楷以萬人寇項

犨擊禽之檢五代史作袒擊破之按袒乃犨弟

謂鮮遺祀也與此微異



總校官庶吉士臣侍朝

校對官編修臣王坦修

謄錄監生臣吳紹恩

欽定四庫全書

欽定四庫全書要
史部

唐書卷一百九十一



詳校官編修臣王天祿

欽定四庫全書

唐書卷一百九十

史部

唐書卷一百九十

宋 端 明 殿 學 士 宋 祁 撰

列傳第一百一十五

三劉成杜鍾張王

劉建鋒字銳端蔡州朗山人為忠武軍部將與孫儒馬
殷同事秦宗權儒之敗建鋒殷收散卒轉寇江西有衆
七千推建鋒為主殷為前鋒張佶為謀主略洪虔數州

衆遂十餘萬乾寧元年取潭州殺武安節度使鄧處訥
自稱節度留後奉表京師詔即拜檢校尚書左僕射武
安軍節度使建鋒已得志即嗜酒不事事新息小史陳
贍為建鋒御者妻美且豔乃私之贍怒袖鐵搘擊建鋒
死斷其喉衆推張佶為帥佶固辭馬踶傷佶左髀下令
曰吾非而主時馬殷攻邵州未克於是遣人迎殷磔贍
于市殷至佶坐受其謁既而率將吏推殷為留後詔即
除檢校太傅潭州刺史殷以成汭楊行密劉隱皆養士

以圖王霸謂其屬高郁曰吾欲重幣以奉四鄰而固吾
境計安出郁曰荆南閭弱焉能患我淮南我讎也固不
吾援公若置邸京師歸天子職貢王人來錫命四方畏
服然後按兵討不廷霸業成矣殷悟厚結宣武朱全忠
以請于朝乃拜湖南節度兵馬留後郁又教殷鑄鉛鐵
錢十當銅錢一民得自摘山收茗算募高戶置邸閣居
茗號八牀主人歲入算數十萬用度遂饒於是收邵衡
永道郴連六州進攻桂州執留後劉士政諸城望風奔

潰盡得昭賀梧象柳宜蒙等州又攻容管執寧遠節度使龐巨曠虜其衆及貲昭宗在鳳翔難方亟遣中人間道賜朱書密詔使殷與楊行密攻汴州殷兵訖不出殷弟賓沈勇知書史從孫儒為盜晚事楊行密為黑雲軍使與錢鏐戰數有功夜卧常有光恆行密知之曰吾今歸汝于兄辭曰賓一敗卒公待以不死湖南在宇下朝亡夕至但誼不忍舍公行密具齋以遺曰爾還與兄共食湘楚然何以報我答曰願通二國好使商賈相資

行密喜既至殷表以自副每勸殷與行密連和殷畏全忠卒不克殷與建鋒同里人凡宗權黨散為盜者皆以酷烈相矜時通名蔡賊云

成汭青州人少無行使酒殺人亡為浮屠後入蔡賊中為賊帥假子更姓名為郭禹當戍江陵亡為盜保火門山後詣荆南節度使陳儒降署裨校久之張瓌囚儒以禹凶慄欲殺之禹結千人奔入峽夜有蛇環其所祝曰有所負者死生唯命既而蛇亡禹乃襲歸州入之自稱

刺史招還流亡訓士伍得勝兵三千秦宗權故將許存
奔禹禹以青州剽卒三百畀之使討荆南部將牟權于
清江禽權取其衆禹又破其將王建肇建肇奔黔州昭
宗拜禹荆南節度留後始改名汭復故姓宗權餘黨常
厚攻夔州是時西川節度使王建遣將屯忠州與夔州
刺史毛湘相脅齒厚屯白帝汭率存乘二軍之間攻之
二軍使人誚辱汭韓楚言尤劇汭恥之曰有如禽賊當
支解以逞會存夜斬營襲厚破之厚奔萬州為刺史張

造所拒走綿州存入夔州楚言妻李語夫曰君常辱軍
且支解不如前死楚言不決李礪刀席下方共食復語
之夫曰未可知李取刀斷其首并殺三子乃自剄汭畏
其烈禮葬之刻石表曰烈女即使司馬劉昌美守夔率
存沂江略雲安建將皆奔存按兵渝州盡下瀕江州縣
時王建肇據黔州自守帝以建肇為武泰軍節度使汭
遣將趙武率存攻之建肇走汭乃以武為留後存為萬
州刺史存不得志汭遣客伺之方蹴毬汭曰存必叛自

試其力矣遣將襲之存夜率左右超堞走與王建肇皆降於王建汭頗知吏治嘗錄囚盡其情墊江賊陰殺令其主簿疑小史導之訊不承臨刑曰我且訟地下踰月吏暴死汭聞益詳於獄始治州民版無幾未再朞自占者萬餘帝數詔刻石頌功輒固辭時鎮國節度使韓建亦以治顯號北韓南郭汭進累檢校太尉中書令上谷郡王雲安榷鹽本隸鹽鐵汭擅取之故能畜兵五萬初任賀隱隱賢者也故汭所舉少過晚得妻父任之譖害

諸子汭皆手殺之至絕嗣澧朗本荆南隸州為雷滿所據別為節度汭數請之宰相徐彥若不許及彥若罷道江陵汭出怨言彥若曰公專一面自視桓文一賊不能取而怨朝廷乎汭大慙晚喜術士餌藥瀕死而蘿天復三年帝詔淮南節度使楊行密圍鄂州朱全忠使韓勍救之調汭與馬殷雷彥威犄角汭身自將而行下知汭不足亢行密無敢諫惟親吏楊師厚勸之汭為巨艦堂皇悉備行至公安卜不吉欲還師厚曰公舉全軍中道

還何以見百姓。汭乃行。彥威潛師略江陵。汭諸將念私無鬪志。淮南將李神福壁沙橋。望汭軍曰：「戰艦雖盛，首尾斷絕可取也。」擊汭。君山敗之火。其船衆大潰。汭投江死。士民皆為彥威所劫。韓勣走還王建。遂取夔施忠萬四州。天祐中全忠表汭死國事。請與杜洪皆立廟云。

杜洪。郢州人。為里俳兒。乾符末黃巢亂江南。永興民皆亡。為盜刺史崔紹募民。彊雄者為土團軍。賊不敢侵於是。人人知兵。杭州刺史路審中為董昌所拒。走客黃州。

中和末聞紹卒募士三千入鄂州以守洪為州將有功
亦逐岳州刺史居之光啓二年安陸賊周通率兵攻審
中審中亡去洪乘虛入鄂自為節度留後僖宗即拜本
軍節度使是時永興民吳討據黃州駱殷據永興二人
皆隸土團者也故軍剽甚洪雖得節制而附朱全忠絕
東南貢路乾寧初身自將擊討乞師淮南楊行密遣朱
延壽助之洪引還延壽拔黃州俘討獻京師駱殷棄永
興走行密取其地洪得駱殷倚為心腹間取永興守之

全忠方圍鳳翔昭宗遣使者東出道武昌洪皆殺之時行密略光州詔洪出兵與忠義趙匡凝武安馬殷襲安州行密使李神福劉存率舟師萬人討洪駱殷棄永興走縣民方詔守以待命神福已得詔大喜以永興壯縣饋餉所仰既得鄂半矣遂進圍鄂州洪嬰城請救於汴全忠率兵五萬營霍丘行密禦之汴兵不利引還使別將吳章以三千兵解圍神福迎破之時全忠方與河東軍薄戰故不能救洪洪乃求助於馬殷殷不答洪計窮

復走全忠全忠遣曹延祚合吳章兵萬三千救洪淮南
將劉存濬坎傅城殷為洪謀曰淮兵深入仰永興以濟
若奇兵取之賊不戰而潰洪以精兵合汴人間道掩永
興三十里而舍存以方詔苗璘當之汴亡卒走淮壁言
軍虛實曰鄆軍懦可取開道軍不可當也璘曰毅強則
弱者撓矣乃自擊開道軍敗之禽汴士三百人徇城下
洪軍氣沮存使辯士臨說洪恃汴方強無降意或勸存
急擊援兵則城自下存曰擊之賊入則城固矣若縱其

遁城可取也俄而汴軍走是日城陷執洪及曹延祚窮斬其餘行密見洪責曰爾同逆賊弑主與孤為仇吾軍還而復為賊後拒今定何如洪謝曰不忍負朱公與延祚皆斬揚州市以劉存守郢州行密死馬殷遂取其地鍾傳洪州高安人以貟販自業或勸其為盜必大顯時王仙芝猖狂江南大亂衆推傳為長乃鳩夷獠依山為壁至萬人自稱高安鎮撫使仙芝遣柳彥璋略撫州不能守傳入據之言諸朝詔即拜刺史中和二年遂江西

觀察使高茂卿遂有洪州撫民危全諷間傳之去竊州
以叛使弟仔昌據信州僖宗擢傳江西團練使俄拜鎮
南節度使檢校太保中書令爵潁川郡王又徙南平傳
率兵圍撫州天火其城士民謹驚諸將請急攻之傳曰
乘人之險不可乃祝曰全諷罪無害民者火即止全諷
聞謝罪聽命以女女傳子匡時傳以匡時為袁州刺史
擊馬殷又以彭玕為吉州刺史玕健將也傳倚以為重
廣明後州縣不鄉貢惟傳歲薦士行鄉飲酒禮率官屬

臨觀資以裝齋故士不遠千里走傳府傳少射獵醉遇虎與鬪虎搏其肩而傳亦持虎不置會人斬虎然後免既責悔之戒諸子曰士處世尚智與謀勿效吾暴虎也乃畫搏虎狀以示子孫凡出軍攻戰必禱佛祠積餌餅為犀象高數尋晚節重毅商人至棄其貨去天祐三年卒匡時自立為節度觀察留後次子匡範為江州刺史怨兄立挈州附淮南因言兄結汴人圖揚州楊渥使秦裴攻匡時圍洪州匡時城守不出凡三月城陷淮軍大

掠三日止執匡時及司馬陳象歸揚州渥切責匡時頓首請死渥哀赦之斬象于市彭玕既失援厚結馬殷且觀虛實使者還曰殷將校輯睦未可圖也遂歸款玕通左氏春秋嘗募求西京石經厚賜以金揚州人至相語曰十金易一筆百金償一篇況得士乎故士人多徃依之始危全諷聞匡時立喜曰聽鍾郎為節度三年我自取之及渥兵盛不敢救潛謀攻渥會淮南亡將王茂章過州請曰聞公欲大舉願見諸將軍才否全諷蒐衆十

萬邀茂章觀之對曰揚州有士三等公衆正當其下盍
更益之全諷不能答後為楊氏所并

劉漢宏本兗州小史從大將擊王仙芝劫輜重叛去乾
符末略江陵焚民室廬廬無完家於是都統王鐸遣將
崔鋗降之表為宿州刺史漢宏恨賞薄有言會浙東
觀察使柳瑫得罪乃授漢宏觀察使代之僖宗在蜀貢
輸踵驛而西帝悅寵其軍為義勝軍即授節度使漢宏
既有七州志侈大輒曰天下方亂卯金刀非吾尚誰哉

鷗噪諸廷命斫樹或曰巨木不可伐怒曰吾能斬白蛇
何畏一木中和二年遣弟漢宥率諸將攻杭州壁西陵
為董昌所敗復遣兵七萬瀕江而屯昌使錢鏐宵濟襲
破之明年漢宏屯黃嶺發洞獠同攻昌鏐出富陽擊諸
營多潰去漢宏大沮悉軍十萬列艦西陵謀宵濟襲昌
禱於江有一矢墜前惡之俄與鏐遇鏐俘馘五千漢宏
羸服走或執之給而免明日復戰鏐斬其弟漢容將卒
約時鍾季文守明州盧約處州蔣瓊婺州杜雄台州朱

襄溫州襄兵最彊故漢宏使襄治大艦習戰以史惠施
堅實韓公汶將其軍帝聞杭越掣戰遣中人焦居璠持
節詔通好皆不奉詔光啓二年鏐率諸將攻越自趨導
山破公汶於曹娥埭與襄戰燒其艦進屯豐山堅實詣
鏐降漢宏率麾下六百人走台州鏐斬其母妻于屯杜
雄饗其軍皆醉執漢宏以見董昌漢宏曰自古豈有不
亡國邪昌使斬于市叱刑者曰吾節度使非庸人可殺
我嘗夢持金殺我者必錢鏐也昌命鏐斬之

張雄泗州漣水人與里人馮弘鐸皆為武寧軍偏將弘
鐸為吏辱雄為辯數并見疑於節度使時溥二人懼禍
乃合兵三百度江壁白下取蘇州據之稍稍嘯會戰艦
千餘兵五萬乃自號天成軍鎮海節度使周寶之敗奔
常州聞高駢將徐約兵銳甚誘之使擊雄與之蘇州雄
匿衆海中使別將趙暉據上元資以舟械寶兵散多降
暉衆數萬雄即以上元為西州負其才欲治臺城為府
旌旗衣服僭王者楊行密圍揚州畢師鐸厚齎寶幣啗

雄連和雄率軍浮海屯東塘是時揚州圍久皮囊革帶食無餘軍中殺人代糧纔千錢聞雄至間道挾珍走軍以銀二斤易斗米逮糠粃以差為直雄軍富過所欲即不戰去暉數剽江道雄擊殺之坑其衆自屯上元大順初以上元為昇州詔授雄刺史未幾卒雄善馭衆人思之為立廟弘鐸代為刺史弘鐸善騎射侃侃若儒者行密已得淮南弘鐸納好然倚兵艦完利謀取潤州遣客尚公迺進說行密行密不從客曰公不見聽未知勝幾

樓船時行密大將田頤在宣州陰圖弘鐸募工治艦工
曰上元為舟市木遠方堅緻可勝數十歲頤曰我為舟
於一用不計其久取木於境可也弘鐸介宣揚間不自
安而州數有怪天復二年大風發屋巨木飛舞州人駭
曰州且易主大將馮暉等勸弘鐸悉軍南嚮聲言討鍾
傳實襲頤行密知之遣客說止不聽頤逆擊於曷山弘
鐸大敗收殘士欲入海行密懼復振遣人迎犒東塘好
謂曰兵有勝負今衆尚彊乃自棄于海奈何吾府雖隘

尚可以居若欲揚州我且讓公弘鐸舉軍盡哭行密等
飛艦不持兵入其軍執弘鐸手尉勉遂以歸表為淮南
節度副使見尚公迺曰頗憶為馮公求潤州否何多尚
邪謝曰臣為君恨其未遂行密笑曰吾得君尚何憂
徐約者曹州人已得蘇州有詔授刺史錢鏐遣弟錄攻
之約驅民墨鏡其形曰願戰南都從事或曰都者國稱
杭終有國乎約後寢窘與其下哭而別入海死鏐使沈
粲守蘇州約衆降潤州阮結結不能定鏐以成及討之

盡殲其衆

王潮字信臣光州固始人五代祖曄為固始令民愛其仁留之因家焉世以貲顯僖宗入蜀盜興江淮壽春亡命王緒劉行全合羣盜據壽州未幾衆萬餘自稱將軍復取光州劫豪傑置軍中潮自縣史署軍正主廩庾士推其信緒提二州籍附秦宗權它日賦不如期宗權切責緒懼與行全拔衆南走略潯陽贛水取汀州自稱刺史入漳州皆不能有也初以糧少故兼道馳約軍中曰

以老孺從者斬潮與弟審邽審知奉母以行緒切責潮
曰吾聞軍行有法無不法之軍對曰人皆有母不聞有
無母之人緒怒欲斬其母三子同辭曰事母猶事將軍
也殺其母焉用其子緒赦之會母死不敢哭夜殯道左
時望氣者言軍中當有暴興者緒潛視魁梧雄才皆以
事誅之衆懼次南安潮語行全曰子美須眉才絕衆吾
不知子死所而行全怪寤亦不自安與左右數十人伏
叢翳徂縛緒以徇衆呼萬歲推行全為將軍辭曰我不

及潮請以為主潮苦讓不克乃除地割劒祝曰拜而劒
三動者我以為主至審知劒躍於地衆以為神皆拜之
審知讓潮自為副緒歎曰我不能殺是子非天乎潮令
于軍曰天子蒙難今當出交廣入巴蜀以幹王室於是
悉師將行會泉州刺史廖彥若貪暴聞潮治軍有法故
州人奉牛酒迎潮乃圍城歲餘克之殺彥若遂有其地
初黃巢將竊有福州王師不能下建人陳巖率衆拔之
又逐觀察使鄭鎰自領州詔即授刺史久之巖卒其婿

范暉擁兵自稱留後巖舊將多歸潮言暉可取潮乃遣從弟彥復將兵審知監之攻福州審知乘白馬履行陣望者披靡號白馬將軍暉守彌年不下潮令曰兵盡益兵將盡益將兵將盡則吾至矣於是彥復急攻暉走入海追斬之建汀二州皆舉籍聽命潮乃盡有五州地昭宗假潮福建等州團練使俄遷觀察使乃作四門義學還流亡定賦斂遣吏勸農人皆安之乾寧中寵福州為威武軍即拜潮節度使檢校尚書左僕射卒贈司空潮

病以審知權節度讓審邦不許詔審知檢校刑部尚書
節度觀察留後厚事朱全忠全忠薦為節度使同中書
門下平章事帝在鳳翔賜審知朱詔自三品皆得承制
除授天祐初進琅邪郡王

審邦字次都為泉州刺史檢校司徒喜儒術通書春秋
善吏治流民還者假牛犁興完廬舍中原亂公卿多來
依之振賦以財如楊承休鄭璘韓偓歸傳懿楊贊圖鄭
戩等賴以免禍審邦遣子延彬作招賢院以禮之

劉知謙壽州上蔡人避亂客封州為清海牙將節度使
章宙以兄女妻之衆謂不可宙曰若人狀貌非常吾以
子孫託之黃巢自嶺表北還湖湘間羣盜蟻結知謙因
據封州有詔即授刺史兼賀水鎮使以遏梧桂知謙撫
納流亡愛嗇用度養士卒未幾得精兵萬人多具戰艦
境內肅然久之疾病召諸子曰今五嶺盜賊方興吾有
精甲犀械爾効建功時哉不可失也知謙卒共推其子
隱為嗣清海軍節度使劉崇龜表為封州刺史嗣薛王

知柔代領節度未至而牙將盧琚叛隱率兵奉迎知柔
直趨廣州禽琚獻之於是知柔以聞昭宗拜隱本軍行
軍司馬俄遷副使天復初節度徐彥若死隱自稱留後
虔人盧光稠者有衆數萬據州自為留後又取韶州隱
與爭之戰不勝悉師攻虔州光稠伏軍掉戰隱縱驅伏
發挺身免天祐初始詔隱權節度留後乃遣使者入朝
重賂朱全忠以自固是歲光稠死子延昌自稱刺史為
其下所殺更推李圖總州事圖死鍾傳盡劫其衆欲遣

子匡時守之不克州人自立譚全播為刺史附全忠云

唐書卷一百九十

欽定四庫全書

唐書卷一百九十一

史部

宋 端 明 殿 學 士 宋 祁 撰

列傳第一百一十六

忠義上

夫有生所甚重者身也得輕用者忠與義也後身先義仁也身可殺名不可死志也大凡捐生以趣義者寧豫期垂名不朽而為之雖一世成敗亦未必濟也要為重

所與終始一操雖頽嵩岱不吾壓也夷齊排周存商商
不害亡而周以興兩人至餓死不肯屈卒之武王蒙慙
德而夷齊為得仁仲尼變色言之不敢少損焉故忠義
者真天下之大閑歟姦鉄逆鼎搏人而肆其毒然殺一
義士則四方解情故亂臣賊子艴然疑沮而不得逞何
哉欲所以為彼者而為我也義在與在義亡與亡故王
者常推而褒之所以砥礪生民而窒不軌也雖然非烈
丈夫曷克為之彼委靡輒熟偷生自私者真畏人也哉

故次叙夏侯端以來凡三十三人于左方

夏侯端壽州壽春人梁尚書左僕射詳孫也仕隋為大理司直高祖微時與相友大業中討賊河東表端為副端邃數術密語高祖曰玉牀搖帝坐不安晉得歲真人將興安天下之亂者其在乎但上性沈忌內惡諸李今金才已誅次且取公宜早為計帝感其言義師興端在河東吏捕送長安帝入京師釋囚引入卧內擢秘書監李密之降關東地未有所屬端請假節招諭乃拜大

將軍為河南道招慰使即傳檄州縣東薄海南捷淮二十餘州遣使順附次譙州會亳汴二州刺史已降王世充道塞無所歸計窮彷徨麾下二千人糧盡不忍委端去端乃殺馬宴大澤中謂衆曰我奉王命義無屈公等有妻子徒死無益吾丐若首持與賊以取富貴衆號泣不忍視端亦泣欲自刎爭持之乃止行五日餓死十四三遇賊衆潰從者纔三十餘人遂東走擷瑩豆以食端持節卧起歎曰平生不知死地乃在此縱其下令去母

俱沒會李公逸守杞州勒兵迎端時河南地悉入世充
公逸感端之節亦固守世充遣人以淮南郡公尚書少
吏部印綬召端解所服衣以贈端曰吾天子使寧汙賊
官耶非持首去不可見即焚書及衣因解節毛懷之間
道走宜陽歷崖峭榛莽比到其下僅有在者皆體髮癯
焦人不堪視端入謁自謝無功不及危困狀帝憫之復
拜秘書監出為梓州刺史散祿稟周孤窮不為子孫計

貞觀元年卒

劉感岐州鳳泉人後魏司徒豐生孫也武德初以驃騎將軍戍涇州為薛仁果所圍糧盡殺所乘馬啖士而煮骨自飲至和木屑以食城垂陷長平王叔良救之賊乃解與叔良出戰為賊執還圍涇州令感約城中降感紿諾至城下大呼曰賊大飢亡在朝暮秦王數十萬衆且至勉之無苦仁果怒執感埋其半土中馳射之至死嘗益甚賊平高祖購得其尸祭以少牢贈瀛州刺史爵平原郡公封戶二千謚忠壯詔其子嗣封爵賜田宅焉

常達陝州陝人仕隋為鷹擊郎將嘗從高祖征伐與宋
老生戰霍邑軍敗自匿帝意已死久乃自歸帝大悅命
為統軍拜隴州刺史時薛舉方強達敗其子仁果斬首
千級舉遣將忤士政給降達不疑厚加撫接士政伺隙
劫之并其衆二千歸賊舉指其妻謂達曰識皇后乎答
曰彼癟老嫗何所道舉奴張貴又曰亦識我否達瞋目
曰若乃奴耳貴忿舉笏擊其面達不為憚亦拔刀逐之
趙弘安為蔽捍乃免仁果平帝見達勞曰君忠節正可

求之古人為執士政殺之賜達布帛三百段以達并劉
感事授史臣令狐德棻云終隴西刺史

敬君弘絳州絳人北齊尚書右僕射顯雋曾孫也累功
歷驃騎將軍封黔昌侯以屯營兵守玄武門隱太子之
死左右解散其車騎將軍馮立者有材武歎曰生賴其
寵死不共難我無以見士大夫乃與巢王親將謝叔方
率兵攻玄武門殊死鬪君弘挺身出或曰事未可判當
按兵待變成列而鬪可也不從與中郎將呂世衡呼而

進皆戰歿立顧其下曰足以報太子矣遂解兵走君弘等敗秦府兵不振尉遲敬德擲巢王首示叔方叔方下馬慟亦出奔明日自歸太宗曰義士也置之俄而立又至帝讓曰汝離我兄弟罪一也殺我將士罪二也何所逃死答曰出身事主當戰之日不知其它因伏地悲不自勝帝亦勞遣之詔贈君弘左屯衛大將軍世衡右驍衛將軍立已蒙貸歸語人曰上赦吾罪吾當以死報未幾突厥犯便橋立引數百騎與虜薄敗之咸陽帝喜授

廣州都督前日牧守苛肆為蠻夷患故數叛立至不事家產衣食弗求贏嘗見貪泉曰此豈隱之所酌邪吾雖日汲庸易吾性哉遂劇飲去在職不三年有惠愛卒于官

叔方歷伊州刺史善治軍戎華愛之累加銀青光祿大夫徙洪廣二州都督卒謚曰勤本萬年人從巢王征討有功王表為屈咥真府左軍騎云

呂子臧蒲州河東人剛直健于吏隋大業末為南陽郡

丞捕擊盜賊有功高祖入京師遣馬元規慰輯山南獨
子臧堅守元規遣士諷曉子臧殺之及煬帝已弑帝更
使其婿薛君倩齎詔言隋所以亡諭子臧子臧為故君
發喪訖即送欵就拜鄧州刺史封南陽郡公武德初朱
粲新劙子臧率兵與元規并力元規兵不進子臧曰乘
賊新敗上下惶沮一戰可禽若遷延其衆稍集吾食盡
致死於我不可當也不納子臧請以所部兵獨進又不
許俄而粲得衆復張元規嬰城子臧扼腕曰謀不見用

坐公死矣賊圍固會霖雨雉堞崩剝或勸其降子臧曰我天子方伯且降賊乎乃率麾下數百人赴敵死城亦陷元規死之元規安陸人初以隊正從帝征伐持節下南陽得兵萬餘然無謀以至于敗

王行敏并州樂平人隋末為盜長高祖興來降拜潞州刺史遷屯衛將軍劉武周入并州寇上黨取長子壺關或言刺史郭子武懦不支且失潞帝遣行敏馳往既至與子武不叶賊圍急儲備空乏衆恫懼行敏患之會有

告子武謀反遂斬之州民陳正謙者以信義稱鄉里出粟千石濟軍由是人自奮賊乃去行敏又敗竇建德兵於武陟武德四年督兵徇燕趙與劉黑闥戰歷亭破之既而釋甲不設備為黑闥所掩縛致麾下終不屈賊遂斬之且死西向跪曰臣之忠惟陛下知之帝聞而悼惜黑闥之亂死者又有盧士叡李玄通

士叡客韓城隋亂結納英豪高祖與之舊及兵興率數百人上謁汾陰又使兄子諭降劇賊孫華與劉弘基敗

隋將桑顯和於飲馬泉擢累右光祿大夫為瀛州刺史
黑闥遣輕騎破其郭拒戰半日士見親屬係虜乃潰士
叡為賊禽欲使說下城堡不從見殺

玄通藍田人為隋鷹揚郎將高祖入關率所部自歸拜
定州總管為黑闥所破愛其才欲以為將玄通曰吾當
守節以報烏能降志賊邪不聽囚之故吏有餉飲餽者
玄通曰諸君見哀吾能一醉遂縱飲謂守者曰吾能劖
舞可借刀守士與之曲終仰天大息曰大丈夫撫方面

不能保所守尚何視息邪乃潰腹死帝為流涕擢其子
伏護大將軍

羅士信齊州歷城人隋大業時長白山賊王簿左才相
孟讓攻齊郡通守張須陁率兵擊賊士信以執衣年十
四短而悍請自効須陁疑其不勝甲少之士信怒被重
甲左右鞬上馬顧眄須陁許之擊賊濰水上陣繞列執
長矛馳入賊營刺殺數人取一級擲之承以矛戴而行
賊皆眙懼無敢亢須陁乘之大破賊士信遂北每殺一

賊輒劓鼻納諸懷暨還驗以代級須陁歎伏遺以所乘
馬凡戰須陁先登士信副以為常煬帝遣使圖須陁士
信陣法上內史後須陁為李密所殺士信與裴仁基歸
密署總管俾統所部討王世充身被重創見獲於世充
世充愛其才厚遇之與同寢食後得密將邴元真等故
士信稍稍疏斥士信恥與伍率所部千餘人來降高祖
拜陝州道行軍總管因謀世充士信行則先鋒反則殿
有所獲悉散戲下有功者或脫衣解馬賜之士以故用

命然持法嚴至親舊無少貸其下亦不甚附師次洛陽
攻千金堡堡有惡言詢軍士信怒夜遣百人載嬰兒曉
諭堡下若自東都出奔者既而陽悟曰非也此千金堡
耳因散去堡兵開門追掠士信伏入屠之無類賊平授
絳州總管封鄆國公從秦王擊劉黑闥洛水上得一城
王君廓戍之賊急攻潰而出王語諸將孰能守此士信
曰願以守乃命之士信已入賊悉衆攻方雨雪救軍不
得進城陷黑闥欲用之不屈而死年二十八王隱悼購

其尸以葬謚曰勇初士信為仁基所禮及東都平出家財斂葬北邙以報德且曰我死嘗墓其側至是如所志張道源并州祁人名河以字顯年十四居父喪士人賢其孝縣令郭湛署所居曰復禮鄉至孝里道源嘗與客夜宿客暴死道源恐主人忽怖卧戶側至曙乃告又徒步護送還其家隋末政亂辭監察御史歸閭里高祖興署大將軍府戶曹參軍至賈胡保復使守并州京師平遣撫慰山東下燕趙有詔褒美封累范陽郡公淮安王

神通略定山東令守趙州為竇建德所執會建德寇河南間遣人詣朝請乘虛擣賊心脅即詔諸將率兵影接俄而賊平還拜大理卿時何稠得罪籍其家屬賜羣臣道源曰禍福何常安可利人之亡取其子女自奉仁者不為也更資以衣食遣之天子見其年耆拜綿州刺史卒贈工部尚書謚曰節道源雖官九卿無貲產比亡餘粟二斛詔賜帛三百段

族孫楚金有至行與兄越石皆舉進士州欲獨薦楚金

固辭請俱罷都督李勣歎曰士求才行者也既能讓何嫌皆取乎乃並薦之累進刑部侍郎儀鳳初彗見東井上疏陳得失高宗欽納賜物二百段武后時歷秋官尚書爵南陽侯有清槩然尚文刻當時亦少之為酷吏所構流死嶺表

李育德趙州人祖諤仕隋通州刺史為名臣世富于財家僮百人天下亂乃私完械甲嬰武陟城自保人多從之遂為長劇賊來掠不能克隋亡與柳燮等歸李密私

署總管密為王世充所破以郡來降即拜陟州刺史兄
厚德自賊所逃歸度河復被執賊使招育德陽許之故
兄不死賊帥段大師令裨校以兵守厚德陰得其驩乃
與州人賈慈行謀逐賊慈行夜登城呼曰唐兵登矣厚
德自獄擁羣囚譟而出斬長史衆不敢動大師縋城走
即拜殷州刺史厚德省親留育德以守引兵拔賊河內
堡三十一所世充怒悉銳士攻之城陷猶力戰與三弟
皆歿時死節者又有李公逸張善相凡三人

公逸者與族弟善行居雍丘以才雄為衆所歸始附王

世充策其必敗乃獻款高祖因其地置杞州即拜總管

封陽夏郡公以善行為刺史世充遣其弟將徐彊兵攻

之公逸請援未報因使善行守身入朝言狀至襄城為

賊遷送洛陽世充曰君越鄭臣唐何哉答曰我於天下

唯聞有唐賊怒斬之善行亦死帝悼惜封其子襄邑縣

公

善相襄城人大業末為里長督兵迹盜為衆附賴乃據

許州奉李密密敗摯州以來詔即授伊州總管王世充
攻之屢困賊遣使三輦請救朝廷未暇也會糧盡衆餓
死善相謂僚屬曰吾為唐臣當効命君等無庸死斬吾
首以下賊可也衆泣不肯曰與公同死愈於獨生城陷
被執罵賊見殺高祖歎曰吾負善相善相不負我乃封
其子襄城郡公

高叡京兆萬年人隋尚書左僕射顥孫也舉明經稍遷
通義令有治勞人刻石載德歷趙州刺史平昌縣子聖

歷初突厥默啜入寇竊嬰城拒虜攻益急長史唐波若度且陷即與虜通竊覺之力不能制即自經不得死為虜執使降諭諸縣不肯應見殺初虜至有為竊計者突厥蠭銳所向無完公不能亢且當下之答曰我刺史不戰而降罪大矣武后歎息贈冬官尚書謚曰節詔誅波若籍其家下制暴斂忠節波若臣賊使天下知之

子仲舒通故訓學擢明經為相王府文學王所欽器開元初宋璟蘇頤當秉多咨訪焉時舍人崔琳練達政宜

環等禮異之常語人曰古事問高仲舒時事問崔琳何復疑終太子右庶子

安金藏京兆長安人在太常工籍睿宗為皇嗣少府監裴匪躬中官范雲仙坐私謁皇嗣皆殊死自是公卿不復見唯工優給使得進俄有誣皇嗣異謀者武后詔來俊臣問狀左右畏慘楚欲引服金藏大呼曰公不信我言請剖心以明皇嗣不反也引佩刀自割腹中腸出被地眩而仆武后聞大驚輿致禁中命高醫內腸褫桑絮

紲之間夕而蘇后臨視歎曰吾有子不能自明不如爾之忠也即詔停獄睿宗乃安當是時朝廷士大夫翕然稱其誼自以為弗及也神龍初母喪葬南闕口營石墳晝夜弗息地本印燥泉忽湧流廬之側李冬有華犬鹿相擾本道使盧懷慎上其事詔表闕于閭景雲時遷右武衛中郎將玄宗屬其事於史官擢右驍衛將軍爵代國公詔鐫其名於泰華二山碑以為榮卒配饗睿宗廟廷大歷中贈兵部尚書謚曰忠以子承恩為盧州長史

中和中擢其遠孫敬則為太子右諭德

王同皎相州安陽人陳駙馬都尉寬曾孫也陳亡徙河
北長安中尚太子女安定郡主拜典膳郎太子中宗也
桓彥範等誅二張遣同皎與李湛李多祚即東宮迎太
子請至玄武門指授諸將太子拒不許同皎進曰逆豎
反道顯肆不軌諸將與南衙執事刻期誅之須殿下到
以係衆望太子曰上方不豫得無不可乎同皎曰將相
毀家族以安社稷奈何欲內之鼎鑊乎太子能自出諭

之衆乃止太子猶豫同皎即扶上馬從至玄武門斬關入兵趨長生殿太后所環侍嚴定因奏誅易之等狀帝復位擢右千牛將軍封琅邪公食實戶五百主進封公主拜同皎駙馬都尉遷光祿卿神龍後武三思烝濁王室同皎惡之與張仲之祖延慶周憬李悛冉祖雍謀須武后靈駕發伏弩射殺三思會播州司兵參軍宋之慈以外妹妻延慶延慶辭之慈固請乃成昏延慶心厚之不復疑故之慈子曇得其實之慈兄之間嘗舍仲之家

亦得其謀令曇密語三思三思遣悛上急變且言同皎
欲擁兵闕下廢皇后帝殊不曉大怒斬同皎於都亭驛
籍其家同皎且死神色自如仲之延慶皆死慄遁入比
干廟自剄將死謂人曰比千古忠臣神而聰明其知我
乎后三思亂朝虐害忠良滅亡不久可干吾頭國門見
其敗也憬壽春人後太子重俊誅三思天下共傷同皎
之不及見也睿宗立詔復官爵謚曰忠壯誅祖雍悛等
先是許州司戶參軍燕欽融再上書斥韋后擅政且逆

節已萌后怒勸中宗召至廷撲殺之宗楚客復私令衛士極力故死又博陵人郎岌亦表后及楚客亂被誅至是俱贈諫議大夫備禮改葬賜欽融一子官

同皎子繇尚永穆公主生子潛字弘志生三日賜緋衣銀魚幼莊重不喜兒弄以帝外孫補千牛復選尚公主固辭元和中擢累將作監吏或籍名北軍輒騎墮不事潛悉奏罷之故不戒而辦監無公食而息錢舊皆私有至潛取以具食遂為故事遷左散騎常侍拜涇原節度

使憲宗與對大悅曰吾知而善職我自用之潛至鎮繕
壁壘積粟構高屋待兵利而嚴遂引師自原州踰硃石
取虜將一人斥烽候築歸化潘原二壘請復城原州度
支沮議故原州復陷穆宗即位封琅琊郡公更節度荆
南疏吏惡榜之里閭殺尤縱者分射三等課士習之不
能者罷故無冗軍太和初檢校尚書左僕射卒于官贈
司空

吳保安字永固魏州人氣挺特不俗睿宗時姚嵩蠻叛

拜李蒙為姚州都督宰相郭元振以弟之子仲翔託蒙
表為判官時保安罷義安尉未得調以仲翔里人也
不介而見曰願因子得事李將軍可乎仲翔雖無雅故
哀其窮力薦之蒙表掌書記保安後徃蒙已深入與蠻
戰沒仲翔被執蠻之俘華人必厚責財乃肯贖聞仲翔
貴胄也求千繡會元振物故保安留嶲州營贖仲翔苦
無資乃力居貨十年得縑七百妻子客遂州間闕求保
安所在困姚州不能進都督楊安居知狀異其故貲以

行求保安得之引與語曰子棄家急朋友之患至是乎
吾請貸官貲助子之乏保安大喜即委縑于蠻得仲翔
以歸始仲翔為蠻所奴三逃三獲乃轉鬻遠酉酉嚴遇
之晝役夜囚役凡十五年乃還安居亦丞相故吏嘉保
安之誼厚禮仲翔遺衣服儲用檄領近縣尉久乃調蔚
州錄事參軍以優遷代州戶曹母喪服除喟曰吾賴吳
公生吾死今親歿可行其志乃求保安于時保安以彭
山丞客死其妻亦沒喪不克歸仲翔為服縗絰囊其骨

徒跣負之歸葬魏州廬墓三年乃去後為嵐州長史迎
保安子為娶而讓以官

李憕并州汶水人或言其先出興聖皇帝譜系疏晦不
復傳父希倩神龍初右臺監察御史憕少秀敏舉明經
高第授成安尉張說罷宰相為相州刺史坐有善相者
說徧問官屬後孰當貴工指憕及臨河尉鄭巖說以女
妻巖而歸其甥陰於憕會母喪免自武功尉以政尤異
遷主簿說在并州引憕置幕府及執政為長安尉字文

融括天下田高選官屬多致賢以重其柄表假憕監察
御史分道檢覈以課真拜御史坐小累下除晉陽令三
遷給事中力于治有任事稱明簿最下無敢給失李林
甫意出為河南少尹尹蕭炅內倚權骯法植私憕裁抑
其謬吏下賴之道士孫翫生以左道幸託祠事往來嵩
少間干請亂吏治憕不為應故挾炅譖諸朝天寶初除
清河太守舉美政遷廣陵長史民為立祠賽祝歲時不
絕以捕賊負徒彭城太守封酒泉縣侯連徙襄陽河東

並兼採訪處置使入為京兆尹楊國忠惡之改光祿卿
東京留守安祿山反玄宗遣封常清募兵東京憕與留
臺御史中丞盧奕河南尹達奚珣繕城壘綏勵士卒將
遇賊西鋒帝聞擢禮部尚書祿山度河號令嚴密候詗
不能知已陷陳留滎陽殺張介然崔無波不數日薄城
下常清兵皆白徒戰不勝輒北憕收殘士數百哀斷弦
折矢堅守人不堪鬪憕約奕吾曹荷國重寄雖力不敵
當死官部校皆夜縋去憕坐留守府奕守臺城陷祿山

鼓而入殺數千人矢著闕門執澄奔及官屬蔣清害之
有詔贈司徒謚曰忠懿河洛平再贈太尉拜一子五品
官澄通左氏春秋頗殖產伊川占膏腴自都至關口疇
墅彌望時謂地癖巖仕終少府監產利埒澄云澄十餘
子江涵淵瀛等同遇害唯源彭脫

源八歲家覆沒為奴轉側民間及史朝義敗故吏識源
於洛陽者贖出之歸其宗屬代宗聞授河南府參軍遷
司農主簿以父死賊手常悲憤不仕不娶絕酒葷惠林

佛祠者澄舊墅也源依祠居閨戶日一食祠殿其先寢
也每過必趨未始踐階自營墓為終制時時偃卧埏中
長慶初年八十矣御史中丞李德裕表薦源曰賈誼稱
守圉扞敵之臣死城郭封疆天寶時士罕伏節逆賊始
興委符組棄城郭者不為恥而澄約義同列守位自如
抵刃就終臣節之光由澄始而源天與至孝絕心祿仕
五十餘年常守沈默理勢深要一辭開析百慮洗然抱
此真節棄於清世臣竊為陛下惜之穆宗下詔曰昔盜

起幽陵振蕩河洛贈太尉澄處難居首正色就死兩河
聞風再固危壁殊節卓焉到今稱之源有曾參之行巢
父之操泊然無營汎此高年夫襄忠所以勸臣節也旌
孝所以激人倫也鎮澆浮莫如尚義厚風俗莫如尊老
舉是四者大倣于時其以源守諫議大夫賜緋魚袋河
南尹遣官敦諭上道帝自遣使者持詔書袍笏即賜又
賜絹二百匹源頓首受詔謂使者伏疾年耄不堪趨拜
即附表謝辭吐哀憇一無受尋卒敬宗時擢澄孫為河

南兵曹參軍

彭擢明經第天寶中選名臣子可用者自咸寧丞遷右補闕從天子入蜀後澄數年卒有孫景讓景莊景溫別傳武德功臣十六人貞觀功臣五十三人至德功臣二百六十五人德宗即位錄武德以來宰相及實封功臣子孫賜一子正員官史館考勳名特高者九十二人以三等條奏第一等以其歲授官第二等以其次年第三等子孫數訟於朝有詔差為二等增至百八十七人每

等武德以來宰相為首功臣次之至德以來將相又次
之大中初又詔求李峴王珪戴胄馬周褚遂良韓瑗郝
處俊婁師德王及善朱敬則魏知古陸象先張九齡裴
寂劉文靜張柬之袁恕已崔玄暉桓彥範劉幽求郭元
振房琯袁履謙李嗣業張巡許遠盧亦南霽雲蕭華張
鎬李勉張鎰蕭復柳渾賈耽馬燧李愬三十七人畫像
續圖凌煙閣云

司空太子太傅知門下省事梁國公房玄齡

尚書右僕射檢校侍中萊國公杜如晦

太子太保同中書門下三品宋國公蕭瑀

開府儀同三司同中書門下三品知政事上柱國申國

公高士廉

太子太師知政事特進鄭國公魏徵

侍中永寧郡公王珪

吏部尚書參預朝政道國公戴胄

中書令江陵縣子岑文本

中書令兼太子左庶子檢校吏部尚書高唐縣公馬周
侍中兼太子左庶子檢校吏部禮部民部尚書事清苑
縣男劉洎

尚書右僕射同中書門下三品河南郡公褚遂良

太子太師同中書門下三品燕國公于志寧

尚書右僕射同中書門下三品兼太子少傅北平縣公

張行成

中書令行侍中兼太子少保蓊縣公高季輔

侍中兼太子賓客襲潁川縣公韓瑗

中書令兼太子詹事南陽縣侯來濟

侍中兼太子賓客張文瓘

侍中甑山縣公郝處俊

中書侍郎同中書門下三品兼太子右庶子酒泉縣公

李義琰

內史河東縣侯裴炎

文昌左相同鳳閣鸞臺三品溫國公蘇良嗣

內史梁國公狄仁傑

納言檢校并州大都督府長史天兵軍大總管隴右諸
軍大使譙縣子婁師德

鳳閣侍郎同鳳閣鸞臺平章事石泉縣公王方慶

文昌左相同鳳閣鸞臺三品襲邢國公王及善

尚書右僕射兼中書令知兵部尚書事齊國公魏元忠

紫微令梁國公姚崇

正諫大夫同鳳閣鸞臺平章事朱敬則

尚書左僕射同中書門下平章事許國公蘇瓌

吏部尚書兼侍中廣平郡公宋璟

黃門監梁國公魏知古

中書侍郎同中書門下平章事充國公陸象先

紫微侍郎同紫微黃門平章事許國公蘇頲

中書令河東縣侯張嘉貞

中書侍郎同中書門下平章事清水縣公李元紘

黃門侍郎同中書門下平章事宜陽縣子韓休

中書令始興縣伯張九齡

司空河東郡公裴寂

納言上柱國魯國公劉文靜

太尉檢校中書令同中書門下三品揚州大都督趙國

公長孫無忌

禮部尚書河間郡王孝恭

尚書右僕射檢校中書令行太子左衛率上柱國衛國

公李靖

司空兼太子太師英國公李勣

開府儀同三司鄜州都督鄂國公尉遲敬德

左光祿大夫洛州都督蔣國公屈突通

陝東道大行臺吏部尚書鄭國公殷開山

衛尉卿夔國公劉弘基

澤州刺史邳國公長孫順德

民部尚書上柱國莒國公唐儉

右驍衛大將軍駙馬都尉譙國公柴紹

右驍衛大將軍襄國公段志立

洪州都督渝國公劉政會

左武候將軍相州都督鄭國公張公謹

右武衛大將軍盧國公程知節

左武衛大將軍上柱國胡國公秦叔寶

弘文館學士秘書監永興縣公虞世南

右衛大將軍兼太子右衛率工部尚書武陽縣公李大

亮

右武衛大將軍邢國公蘇定方

夏官尚書同中書門下三品清邊道行軍總管耿國公

王孝傑

中書令漢陽郡公張柬之

中書令博陵郡公崔玄暉

侍中平陽郡公敬暉

侍中譙國公桓彥範

中書令南陽郡公袁恕已

右武衛大將軍同中書門下三品韓國公張仁原

尚書左丞相兼黃門監徐國公劉幽求

黃門侍郎參知機務脩文館學士齊國公崔日用

兵部尚書同中書門下三品代國公郭元振

尚書左丞相兼中書令集賢院學士燕國公張說

紫微侍郎上柱國趙國公王琚

兵部尚書同中書門下三品持節朔方軍節度大使中

山郡公王晙

尚書左僕射同中書門下平章事兼河南江淮副元帥
東都留守冀國公裴冕

文部尚書同中書門下平章事清河縣公房琯

門下侍郎同中書門下平章事衛國公杜鴻漸

鎮西北廷行營節度使開府儀同三司衛尉卿兼懷州

刺史虢國公李嗣業

平盧軍節度使柳城郡太守劉正臣

恒州刺史衛尉少卿兼御史中丞顏杲卿

常山郡太守袁履謙

河南節度副使左金吾衛將軍檢校主客郎中兼御史

中丞張巡

睢陽郡太守兼御史中丞許遠

御史中丞留臺東都知武選盧奕

睢陽郡太守特進左金吾衛將軍霽雲

右第一

內史令延安郡公竇威

將作大匠判納言陳國公竇抗

侍中兼太子左庶子江國公陳叔達

納言觀國公楊恭仁

判吏部尚書參議朝政安吉郡公杜淹

中書令虞國公溫彥博

中書侍郎檢校刑部尚書參知機務崔仁師

中書令兼檢校太子詹事上柱國安國公崔敦禮

戶部尚書平恩縣公許圉師

兵部尚書同中書門下三品湞江道行軍總管任雅相
度支尚書同中書門下三品范陽郡公盧承慶

西臺侍郎同東西臺三品兼弘文館學士楚國公上官
儀

右相廣平郡公劉祥道

左侍極兼檢校左相嘉興縣子陸敦信

文昌左相同鳳閣鸞臺三品樂城縣公劉仁軌

荊州大都督府長史安平郡公李安期

尚書右僕射同中書門下三品兼太子賓客襲道國公
戴至德

司列少常伯太子右中護兼正諫大夫同東西臺三品

趙仁本

中書令趙國公李敬玄

中書令兼太子左庶子薛元超

中書令同中書門下三品崔知溫

侍中同中書門下三品襲廣平郡公劉齊賢

納言樂平縣男王德真

地官尚書檢校納言鉅鹿縣男魏玄同

文昌左相同鳳閣鸞臺三品特進輔國大將軍鄧國公

岑長倩

鳳閣侍郎同鳳閣鸞臺三品臨淮縣男劉禕之

納言博昌縣男韋思謙

地官尚書同鳳閣鸞臺平章事格輔元

司禮卿判納言事渤海縣子歐陽通

內史李昭德

鸞臺侍郎同鳳閣鸞臺平章事陸元方

鳳閣侍郎同鳳閣鸞臺三品杜景佺

尚書右僕射兼太子賓客同中書門下三品鄖國公韋

安石

左散騎常侍同中書門下三品知東都留守趙郡公李懷遠

中書令逍遙公韋嗣立

守侍中同中書門下三品兼太子右庶子常山縣男李
日知

檢校黃門監漁陽縣伯盧懷慎

中書令左丞相兼侍中安陽郡公源乾曜

黃門侍郎同紫微黃門平章事魏縣侯杜暹

侍中趙城侯裴耀卿

左武衛大將軍開府儀同三司淮安王神通

特進太常卿江夏王道宗

荊州都督周國公武士彠

右屯衛大將軍檢校晉州都督總管譙國公竇琮

少府監葛國公劉義節

右光祿大夫羅國公張平高

洛州都督右衛大將軍鄧國公竇軌

夔州都督息國公張長穩

金紫光祿大夫夷國公李子和

左監門衛大將軍檢校右武候將軍榮國公樊興

左監門衛大將軍巢國公錢九隴

右驍衛大將軍歸國公安興貴

右武衛大將軍申國公安脩仁

殿中監郢國公宇文士及

右武衛大將軍河陽郡公公孫武達

荊州都督懷寧郡公杜君綽

右驍衛將軍濮國公龐卿惲

代州都督同安郡公鄭仁恭

右翊衛將軍遂安郡公李安遠

幽州都督歷陽郡公獨孤彥雲

始州刺史左屯衛大將軍襄武郡公劉師立

右威衛大將軍濟東郡公李孟嘗

右監門衛大將軍河南縣公元仲文

右監門衛將軍廬陵郡公秦師行

左領軍大將軍新興公馬三寶

右衛大將軍駙馬都尉畢國公阿史那社爾

鎮軍大將軍號國公張士貴

左衛大將軍琅邪郡公牛進達

鎮軍大將軍嘉州郡公周護

陝州刺史天水郡公丘行恭

潭州都督吳興郡公沈叔安

散騎常侍豐城縣男姚思廉

太子少師同中書門下三品特進朔方道行軍大總管

宋國公唐休璟

左羽林軍大將軍遼陽郡王李多祚

左領軍大將軍趙國公李湛

刑部尚書太子賓客魏國公楊元琰

殿中監兼知總監汝南郡公翟無言

冠軍大將軍左羽林軍大將軍光祿卿天水縣公趙承

恩

將作大匠裴思諒

右羽林軍將軍弘農郡公楊執一

左衛將軍河東郡公薛思行

光祿卿駙馬都尉琅邪郡公王同皎

中書令越國公鍾紹京

太僕卿立節郡王薛崇簡

右金吾衛大將軍涼國公李延昌

太子中允同正冀國公馮道力

少府監趙國公崔謗之

左監門衛中候光祿卿申國公許輔乾

左金吾衛大將軍鄧國公張暉

朔方道行軍大總管左羽林軍大將軍平陽郡公薛訥
河南副元帥太尉兼侍中臨淮郡王李光弼

河東節度副大使守司空兼兵部尚書霍國公王思禮
左相幽國公韋見素

太保韓國公苗晉卿

中書令趙國公崔圓

太原節度使檢校尚書左僕射同中書門下平章事金

城郡王辛雲京

河西隴右副元帥兵部尚書同中書門下平章事涼國

公李抱玉

太子太師檢校尚書右僕射知省事信都郡王田神功
四鎮北庭涇原節度使檢校尚書左僕射知省事扶風
郡王馬璘

左羽林軍大將軍檢校戶部尚書兼御史大夫薛景仙
右散騎常侍檢校禮部尚書兼御史大夫尚衡

太原尹兼御史大夫北都留守河東節度副大使南陽

郡公鄧景山

河東節度副使兼鴈門郡太守光祿卿賈循

禮部尚書東京留守酒泉縣侯李憕

東平郡太守姚闇

右第二

盧奕黃門監懷慎少子也疏眉目豐下謹重寡欲斤斤
自修與兄無名相上下而剛毅過之天寶初為鄂令所

治輒最積功擢給事中拜御史中丞自懷慎與及奕三
居其官清節似之時傳其美俄留臺東都兼知武部選
安祿山陷東都吏亡散奕前遣妻子懷印間道走京師
自朝服坐臺被執將殺之即數祿山罪徐顧賊徒曰為
人臣者當識逆順我不蹈失節死何恨觀者恐懼奕臨
刑西向再拜而辭罵賊不空口逆黨為變色肅宗詔贈
禮部尚書下有司謚時以為洛陽亡操兵者任其咎執
法吏去之可也委身寇讎以死誰對博士獨孤及曰苟

息殺身於晉不食其言也玄冥勤其官水死守位忘躬
也伯姬待姆而火死先禮後身也彼死之日皆於事無
補然則祿山亂大於里不奕廉察之任切於玄冥之官
分命所繫不啻保姆逆黨兵威烈於水火于斯時也能
與執干戈者同其戮力挽之不來推之不去全操白刃
之下孰與夫懷安偷生者同其風請謚曰貞烈諂可子
杞別有傳杞子元輔

元輔字子望少以清行聞擢進士補崇文校書郎杞死

德宗念之不忘拜元輔左拾遺歷杭常絳三州刺史課
當最召授吏部郎中進累兵部侍郎為華州刺史卒元
輔端靜介正能紹其祖故歷顯劇而人不以杞之惡為
累云

張介然者猗氏人本名六朗性慎愿長計畫始為河隴
支郡太守王忠嗣皇甫惟明哥舒翰踵領節度並署營
田支度等使入奏稱旨賜與良渥介然啓曰臣位三品
當給棨戟若列於京師雖富貴不為鄉人知願得列戟

故里玄宗許之別賜戟京師第門仍賜絹五百匹宴閣
里長老本鄉得列戟自介然始翰薦為少府監歷衛尉
卿祿山反授河南節度採訪使守陳留陳留據水陸劇
居民孳夥而太平久不知戰介然到屯不三日賊已渡
河車騎蹂騰煙塵漫數十里日為奪色士聞鉦鼓聲皆
褫氣不能授甲凡旬六日城陷初有詔購賊首而暴誅
慶宗狀祿山入陳留見詔書拊膺大哭曰我何罪吾子
亦何罪乃殺之即大憲憤殺陳留降者萬人以逞血流

成川斬介然於軍門以偽將李廷望為節度使守陳留
祿山已拔陳留則鼓而前無敢亢中宿攻滎陽太守崔
無跋率衆乘城聞師譟自墜如雨無跋與官屬皆死賊
手以偽將武令珣戍焉無跋者本韋后外家博陵舊望
也始無跋娶蕭至忠女至忠敗被貶久乃為益州司馬
素善楊國忠既用事引為少府監守滎陽有詔贈禮部
尚書謚曰毅勇

唐書卷一百九十一

謹案卷一百九十六第十六頁前五行又取韶州隱
與爭之戰不勝云云按五代史載此事隱並作
巖

卷一百九十一第四頁前一行仕隋為鷹揚擊郎
將按舊書擊作揚檢隋書百官志有鷹揚郎將
鷹揚副郎將後改副郎將為鷹擊郎將則鷹揚
與鷹擊有正副之異此及舊書必有一誤

第四頁後三行北齊尚書右僕射顯雋曾孫也按


北史顯儕傳作度支尚書此及宰相世系表舊書傳俱作僕射與北史異

第四頁後四行封黠昌侯按宰相世系表作黠昌公此及舊書傳俱作侯與表異

第十頁前五行拜綿州刺史按舊書作相州都督與此異

第十頁前八行族孫楚金按舊書族孫作族子與此異

第十七頁後五行授成安尉按舊書作咸陽尉與
此異



總校官庶吉士臣侍朝

校對官檢討臣王坦修

謄錄監生臣梅德